

արքային. եւ մատուցեալ բուռն հարկաներ զաջոյ եպիսկոպոսապետին Ներսեսի, եւ երդնոյր: 27 Սոյնպէս եւ ի թագաւորին Պապայ ձեռն արկաներ, երդնոյր եւ ասեր՝ թէ կեցից եւ մեռայց ի վերայ քո որպէս նախնիքն իմ ի վերայ նախնեացն քոց, որպէս եւ հայրն իմ ի վերայ հաւրն քո Արշակայ, սոյնպէս եւ ես ի վերայ քո. բայց միայն չարախաւսացն ունկն մի՛ դնիցես:

28 Ապա արհիւնէր զնա քահանայապետն Հայոց Ներսես բազում արհիւնութեամբ: 29 Ապա թագաւորն Հայոց Պապ զերիվարն զիւր եւ զիւր նիզակն հրամայեաց մատուցանել առն քաջի զաւրավարին Մուշեղի. այլ նա ոչ առ. Իմովն, ասէ գործեցից. ապա դու, արքայ, զինչ եւ տացես՝ ի ձեռս քո եմ: 30 Եւ զիւր նշանն եւ զզէն մատուցանէր առ Ներսես, զի արհիւնեսցէ: 31 Եւ հեծանէր իւրով զնոգան հանդերձ, եւ զամենայն ճակատն Հայոց յարդարեալ յաջմէ զաւրացն Յունաց, յաջում թեւի նա խաղայր յառաջ:

32 Իսկ թագաւորն Պապ եւ եպիսկոպոսապետն Ներսես կային ի վերայ Նպատ լերինս. եւ սուրբն Ներսես զբազուկսն հանապազատարածս համբարծեալ յերկինս, ինդրեր ի Տեառնէ՝ զի անխայեսցէ Տէր ի յուխտ իւր եւ ի սուրբ եկեղեցիս իւր, զոր պատուական արեամբն իւրով ստացաւ. եւ մի տալ զԺողովուրդսն ի ձեռս անաստուած հեթանոսաց, զի մի՛ երբէք ասիցեն ի հեթանոսս՝ թէ ո՛ր է Աստուած նոցա: 33 Եւ մինչ դեռ նա զաղաւթսն մատուցանէր առ Աստուած, խաղացեալ ճակատեալ իբրեւ զիւր ամենայն զաւրքն Հայոց ընդդէմ զաւրացն Պարսից, իսկ գունդն Մուշեղեան յառաջեալ քան զայլ գունդսն՝ յառաջամուխ տագնապեալ երթային. մինչ զի նայէր թագաւորն եւ տեսանէր զի ըստ ական անգանեին, մինչ զի ոչ երեւեին թագաւորին նշանքն Մուշեղի: 34 Իսկ իբրեւ չերեւել սկսան նշանքն, աղաղակել սկսաւ թագաւորն Պապ առ Ներսես եւ ասէ. Դու խաբէցեր այրեցեր զիս¹. զի ասացի ես բանս, մի՛ յղեր զայրն զայն ի գործ պատերազմիս. ահա ի զաւրսն Պարսից անկաւ, եւ արդ մեծամեծ վնաս գործեսցէ: 35 Եւ ասէ եպիսկոպոսապետն Ներսես. Մի՛, արքայ, մի՛ կարծեր. զի ոչ ստէ մեզ այրն այն. այլ տեսցես քեզէն զքաջութիւն նորա, զոր գործեսցէ ծառայ քո առաջի քո:

36 Իսկ թագաւորն Պապ կարի ստիպէր առ եպիսկոպոսապետն Ներսես ասել՝ թէ ստեպ կաց յաղաւթս եւ աղաչեա զՏէր մինչ դեռ խառնուրդքս են: 37 Իսկ իբրեւ կարի ձանձրացոյց, ասէ եպիսկոպոսապետն Ներսես ցթագաւորն Պապ. Եթէ իցէ՝ ուղղեսցես զսիրտ քո առ Տէր, զթասցէ ի վերայ քո եւ ի վերայ աշխարհիս. եւ իցէ՝ թէ սրբեսցես զքեզ ի պղծութենէ գործոց քոց, ընկալցի եւ ոչ թողցէ ի ձեռաց զքեզ, եւ ոչ մատնեսցէ զքեզ ի ձեռն թշնամեացն քոց: 38 Իսկ ես ո՛վ եմ, զի աղաչես դու զիս, իբրեւ եթէ ես այր մի տառապեալ կարիցեմ հակառակ ընդդէմ կամացն՝ զոր ինչ կամիցի առնել Աստուած՝ առ-

1 Յոր. խլեցեր